

南
北
史
合
注

欽定四庫全書

南北史合注卷一百六十九

明李清撰

北史八十三

周楊氏

魏壽陽公主

周千金公主

隋蘭陵公主

南陽公主

齊斛律妃

隋襄城王恪妃

華陽王楷妃

崔覽妻封氏

封卓妻劉氏

魏溥妻房氏

胡長命妻張氏

平原女子孫氏

房愛親妻崔氏

涇州貞女倪氏

姚氏婦楊氏

張洪祁妻劉氏

董景起妻張氏

陽尼妻高氏

史映周妻耿氏

任城國太妃孟氏

苟金龍妻劉氏

貞孝女宗

河東姚氏女

刁思遵妻魯氏

西魏孫道溫妻趙氏孫神妻陳氏

宋婦李氏

燕國夫人洗氏

鄭善果母崔氏

孝女王舜

韓親妻于氏

陸讓母馮氏

劉昶女

鍾士雄母蔣氏

孝婦覃氏

元務光母盧氏

裴倫妻柳氏

趙元楷妻崔氏

題烈后主妃

或曰子列魏宇文后周楊后為烈后先之烈女傳何也
前史有比例否予曰無有然皇后位尊而烈女名馨是
天子恨不為學士之說也若謝所貴以就所馨則下者
愈知所趨矣且皇后前夫見于漢代一而皇后後夫見
於魏齊周三代七魏孝莊后也而嫁節閔后也而嫁孝
武孝靜后也而嫁齊後主兩后與周靜后也而亦嫁與

同傳則蓋故予析而分之另題為烈后以此若壽陽主
見蕭贊傳千金主見突厥傳蘭陵南陽兩主與襄城華
陽兩妃見本史烈女傳皆改附二后後以志同德云

魏廢帝皇后宇文氏周文女也后初產日有雲氣滿室
芬氲久之幼有風神好陳烈女圖置之左右周文曰每
見此女良慰人意廢帝為太子納為妃及即位立為皇
后志操明秀帝深重之專寵後宮不置嬪御帝既廢弒
后亦以忠於魏室罹禍山崩

愚按人知漢孝平王后孝獻曹后周宣楊后而獨不知后何也本傳內末一言定矣既無太原樂平二公主名又無山陽公矣人名而獨以后名正終幸矣

周宣帝皇后楊氏名麗華隋文長女帝在東宮武帝納為皇太子妃宣政元年閏六月立為皇后帝後稱天元皇帝號后為天元皇后尋又立天皇后及左右皇后與后為四皇后二年二月詔取象四星后及三皇后並加大馬冊授后為天元大皇后又立天中大皇后與后為

五皇后后性柔婉不妬忌五皇后及嬪御等咸愛而仰之帝後昏暴滋甚喜怒申度嘗譴后欲加之罪后進止詳閑辭色不撓帝大怒賜后死逼令引決后母獨孤氏聞之詣闕陳謝叩頭流血乃得免帝崩靜帝尊后為皇太后居弘聖宮初宣帝不豫詔隋文入禁中侍疾及大漸劉昉鄭譯等因矯詔以隋文受遺輔政后初雖不預謀然以嗣主幼冲恐權在他族不利于已聞昉譯已行此詔甚悅後知父有異圖意頗不平及行禪代憤悅愈

其隋文內甚愧之封后為樂平公主後又議奪其志后誓不許乃止大業五年從煬帝幸張掖崩于河西詔遷京所司備禮祔葬后於周定陵

魏壽陽公主元氏字荳梨彭城王勰女孝莊妹也永安中下嫁丹陽王蕭贊主邑姜贊甚敬之與主語常自稱下官後除齊州刺史爾朱兆陷京師贊棄州北走時爾朱世隆專權遣取主客至洛陽自逼之主罵曰逆賊敢辱天王女乎我寧受劍而死不為逆賊所汙世隆怒縊

殺之

周千金公主宇文氏文帝子趙王招女大象元年突厥
他鉢可汗請和親宣帝以主嫁之隋文專政以主適突
厥為辭徵招及陳越代滕五王入朝尋皆害之他鉢卒
沙鉢略可汗立及隋文篡位族宇文氏無遺類主傷宗
祀覆滅日夜言于沙鉢略請為周室復讐沙鉢略謂其
臣曰我周之親也今隋公自立而不能制何面目見可
賀敦乎與隋戰屢敗兼有內難不得已請和主亦上書

請為一子之例隋文遣虞慶則使于沙鉢略沙鉢略稱
病不拜主私謂慶則曰可汗豺狼性過與爭將齧入已
而竟拜隋文乃賜主姓楊氏編之屬籍改封大義公主
然主未嘗一日忘周也沙鉢略卒都藍可汗立會隋文
平陳以陳叔寶屏風賜主主心恒不平因書屏風為詩
叙陳志自寄其辭曰盛衰等朝暮世道若浮萍榮華實
難守池臺終自平富貴今安在空事寫丹青盃酒恒無
樂絃歌詎有聲余本皇家子飄流入鹵庭一朝觀成敗

懷抱忽縱橫古來共如此非我獨申名惟有明君曲偏
傷遠嫁情隨文聞而惡之禮賜益薄主復與西突厥泥
利可汗連結隋文恐其為變將圖之會言主與所從胡
安遂迦私通因發其事見長孫晟傳隋文下詔廢主
恐都藍不從遣竒章公牛弘將美妓四人啗之時沙鉢
略子曰染干號突利可汗居北方遣使求婚隋文令裴
矩謂之曰當殺大義公主者方許婚突利以為然復譖
之都藍都藍發怒遂殺主於帳

予論曰吾於周千金公主獨憐且敬也今讀所題屏風詩雖寓言陳亡實愴懷周滅嗟乎周燼隋熾矣其一二故臣盡從風靡矣斯時也悲歌憤惋矢雪黍離恨僅一漂流鹵地之公主所當率賈國諸臣羅拜屏風下而以巾幘發鬢眉之氣者乃反加之誣云私於胡人安遂迦茲按所謂遂迦止因隋人楊欽亡入突厥故主以遂迦姓而合策圖隋耳若果私者真也猶當錄義舉掩隱過顧可以長孫晟之陰謀突利之策

口而既殞其身又污其名乎彼以十三鍰金帶媚隋
文者獨非私于權逆而甘以其身作淫奔之醜婦者
哉史臣不罪李穆私獨罪公主私何也故予為白其
心而表其事若此

隋蘭陵公主楊氏字阿五文帝第五女美姿容性婉順
帝於諸女中特鍾愛初嫁儀同王奉孝奉孝卒適河東
柳述

愚按奉孝之亡主不能自誓靡他而為後夫死是隋

之雌豫子也吾節取之仍隋書烈女

時年十八矣諸姊並驕踞主獨折節遵婦道事舅姑甚謹遇疾必親奉湯藥帝聞之大悅由是述漸寵遇初晉王廣欲以主配其妃弟蕭瑒帝將許之後適述王不悅及述用事彌惡之文帝崩述徙嶺表煬帝令主與述離絕將改嫁之主以死自誓不復朝謁表求免主號與述同徙帝大怒曰天下豈無男子欲與述同徙邪主曰先帝以妾適抑家今有罪妾當從坐帝不悅主憂憤卒時

年三十二臨終上表生不得從夫死乞葬柳氏

隋書載表曰昔共姜自誓著美前詩息媯不言傳芳
住誥妾雖負罪竊慕古人生既不得從夫死乞葬於

柳氏

帝覽表愈怒竟不哭葬主于洪濟川資送其薄朝野傷
之

舊唐書載李密數煬帝罪曰蘭陵公主逼幸告終同
齊襄之耻誣乎實乎并錄以備考

南陽公主楊氏煬帝長女美風儀有志節十四嫁許國公宇文述子士及以謹肅聞述病且卒主親調飲食手自奉上及宇文化及弑逆

革命記曰煬帝知歷窮欲南渡江朝士咸言不可帝知其意乃將毒藥醞酒三十石擬于三月十六日宴酖殺百官南陽公主恐其夫死陰告之由是事洩羣逆遂害帝免禍

又通鑑考異曰此度通等有耻弑逆名故推過人主

云耳南陽無是

主隨至聊城而化及為竇建德所敗士及自濟北西歸
時隋代衣冠引見建德莫不惶惶失常惟主神色自若
建德與語主自陳國破家亡不能報怨雪耻淚下盈襟
聲辭不輟情理切至建德及觀聽者莫不動容隕涕及
建德誅化及時主有一子名禪師年且十歲建德遣虎
賁將將于士證謂主曰字文化及躬行弑逆今將族滅
其宗公主之子當從坐若不能割愛亦聽留之主泣曰

虎賁既隋室貴臣此事何須見問建德竟殺之主尋請
建德薙髮為尼及建德敗將歸西京復與士及過于東
都主不與相見士及就之請復為夫妻主拒曰我與君
讐家恨不手刃君但謀逆之際君不預知耳固與告絕
呵令速去士及固請主怒曰必欲就死可相見也士及
知不可屈拜辭而去

不意梟獍生此烏鳥但恨其不為男子

齊斛律妃見太子百年傳不忍離之也噫玦猶在手

隋襄城王恪妃循州刺史柳旦女妃姿容端麗年十餘
以良家子合法相聘為妃未幾恪被廢妃修婦道事之
愈敬煬帝嗣位復徙邊令使者殺之于道恪與辭決妃
曰若王死妾誓不獨生相對慟哭恪死棺斂訖妃謂使
者曰妾誓與楊氏同穴若身死後幸不別瘞君之惠也
遂撫榭號慟自經卒見者莫不流涕

華陽王楷妃黃門侍郎龍涸公河南元巖女

隋有兩元巖一封平昌郡公為蜀王秀長史以剛直

著者是另有傳非此元巖也

巖明敏有器幹煬帝嗣位坐與柳述連事除名徙南海後會赦還長安有人譖巖逃歸收殺之妃有姿色性婉順初以選為妃未幾措被幽廢妃事措愈謹每見措憂懼輒陳義理慰諭之措甚敬焉及江都之亂措遇害

據太子勇傳除長子儼為煬帝所酖外餘子皆分徙嶺表殺之中道非以江都之變也恐誤

字文化及以妃賜其黨元武達初以宗族禮之置別舍

後因醉逼之妃自誓不屈武達怒撻之百餘詞色彌厲
自毀其面血淚俱下武達釋之妃謂其徒曰不能早死
將見侵辱我之罪也不食卒

舊題烈女

蓋婦人之德雖在溫柔立節垂名咸資貞烈溫柔仁之
本也貞烈義之資也非溫柔無以成仁非貞烈無以顯
義是以詩書所記風俗所存圖象丹青流聲竹素莫不
守約以居正殺身以成仁者若文伯王陵之母白公杞

杞植之妻魯之義姑梁之高行衛君靈王之妾夏侯文
寧之女或抱信會真或蹈忠踐義不以存亡易心不以
盛衰改節佳名彰于既沒徽音傳于不朽不亦休乎或
有王公大人之妃偶肆情淫僻雖衣文衣食珍膳坐金
屋乘玉輦不入彤管之書不霑青史之筆將草木以俱
落與麋鹿而同死者可勝道哉永言載思實庶姬之耻
也魏隋二書並有烈女傳齊周無此篇今得武功孫道
溫妻趙氏河北孫神妻陳氏附魏隋二傳以備列女篇

云

魏中書侍郎清河崔覽妻封氏渤海人散騎常侍封愷女

魏書愷作禮

有才識聰辯強記多所究知時李敷公孫文叔雖貴重近世故事有所不達皆就而諮請

渤海封卓妻劉氏彭城人成婚一夕卓官于京師後以事伏法劉氏在家忽然夢想知卓已死哀泣嫂喻之不

止經旬凶問果至積憤歎而死時比之秦嘉妻中書令
高允念其義高而名不著為之詩曰兩儀正位人倫肇
甄爰剖夫婦統業承先雖曰異族氣猶自然生則同室
終棄黃泉其一封生令達卓為時彥內協黃中外兼三變

誰能作配克應其選實有莘宗挺生淑媛其二形隔勢殊

山川乖互乃奉王命載馳在路公務既弘私義獲著因

媒致幣邁止一暮其三率我初冠眷彼弱笄形由禮比情

以趣諧欣願難常影跡易乖悠悠言邁戚戚長懷其四時

遇險迫橫罹塵網伏鎖就刑身分土壤千里雖迴應如

影響良嬪洞感發于夢想

其五

仰惟親命俯尋嘉好誰謂

會淺義深情到畢志守窮誓不二照何以驗之殞身是

効

其六

人之處世孰不厚生必存于義所重則輕結憤鍾

心甘就幽冥永損堂宇長辭母兄

其七

芒芒中野翳翳孤

丘葛藟冥蒙荆棘四周理苟不昧神必俱遊異哉貞婦

曠世靡儔

鉅鹿魏溥妻房氏常山人後燕慕容垂貴鄉太守房港

女幼有烈操年十六溥遇疾且卒顧謂之曰死不足恨但痛母老家貧赤子蒙眇抱怨黃壚耳房垂泣曰幸承先人餘訓出事君子義在偕老有志不從命也夫人在堂弱子襁褓顧當以身少相感永深長往之恨俄溥卒及將大斂房氏操刀割左耳投棺中仍曰鬼神有知相期泉壤流血滂然助喪者哀懼姑劉氏輟哭謂曰新婦何至此對曰新婦少年不幸早寡實慮父母未量至情覲持此自誓耳聞者莫不感愴時子緝生未十旬鞠育

後房內未嘗出門遂終身不聽絲竹不預座席緝年十
二房父母仍存乃歸寧父兄尚有異議緝竊聞以啟母
命駕給云他行遂歸行數十里家方覺兄弟來追房哀
歎不反訓導一子有母儀法度緝交遊名勝則身具酒
饌有不及已者輒屏卧不食須其悔謝乃食善誘嚴訓
皆此類年六十五終緝子悅後為濟陰大守吏民立碑
頌德金紫光祿大夫高閭為其文曰爰及處士邁疾夙
凋伉儷秉志識茂行高殘形顯操誓教久要溥未仕卒

故云處士

樂部郎胡長命妻張氏不知何許人事姑王氏甚謹太
安中京師禁酒張以姑老且患私醞之為有司所糾王
氏詣曹自首由已私釀張氏曰姑老抱患張主家事姑
不知釀主司不知所處平原王陸麗以狀奏文成義而
赦之

平原鄒縣女子孫氏名男玉夫為零陵縣人所殺男玉
追執讐人欲自殺之其弟止而不聽男玉曰女子出適

以夫為天當親自復雪云何假人乎遂以杖毆殺之有
司處死以聞獻文詔曰男玉重節輕身以義犯法緣情
定罪理在可原其特恕之

清河房愛親妻崔氏同郡崔元孫女性嚴明有高節歷
覽書傳多所聞知親授子景伯景光九經義學行修明
並為當世名士景伯為清河太守每有疑獄常先請之
貝丘人列子不孝更欲案之景伯悲傷入白母母曰山
民未見禮教何足遽責但呼而母來吾與之同居其子

置汝左右令見汝事吾或應自改景伯遂召其母及至
崔氏處之于榻與共食觀景伯溫情其子侍立堂下未
及旬日悔過求還崔氏曰此雖顏慙未知心愧且可置
之凡經二十餘日子叩首流血母涕泣乞還方聽之終
以孝聞其識度勵物如此竟以壽終

貞女兒氏

魏書兒作兕先凡兩見

涇州人許嫁彭老生為妻聘幣既畢未及成禮兒氏率

行貞淑居平常自春汲以養父母老生輒往逼之女曰
與君聘命雖畢二門多姑未及相見何由不稟父母擅
見凌辱若行非禮正可身死耳遂不肯從老生怒刺殺
之取其衣服女尚能言臨死謂老生曰生身何罪與君
相遇我所以執節自固正欲奉給君耳今反為君殺魂
而有知自當相報言終絕老生特女衣服珠纓至其叔
宅叔曰若殺汝婦天不祐汝執送官太和七年有司劾
以死詔曰老生強暴侵凌貞淑便可戮之而女守禮履

節沒身不改雖處草莽行合古跡宜賜姜名以顯風操
其標墓旌姜號貞女

姚氏婦楊氏閩人符承祖姨家貧承祖為文明太后所
寵貴親姻皆求利潤唯楊獨不欲常謂其姊曰姊雖一
一時之榮不若妹有無憂之樂姊每遺以衣服皆不受
強與之謂我夫家世貧見好衣美服使人不安與之奴
婢謂我家無食不能供終不肯受常著破衣自執勞苦
時受其衣服多不著密埋之設有著者污之後服承祖

見其寒悴乃啟母曰今承祖一身何乏而使姨如是母具語之乃遣人乘車往迎則厲志不起遣人強舉車上則大哭言爾欲殺我由是符家內外皆號癡姨及承祖敗有司執其二姊至殿庭致法以姚氏婦衣弊特免罪其先識如此

張洪祁妻劉氏滎陽京縣人年十七夫亡遺腹生一子三歲又沒舅姑年老朝夕奉養率禮無違兄矜其少寡欲奪嫁之劉自誓不許終其身

董景起妻張氏陳留人景起早亡張時年十六痛夫少喪哀傷過禮蔬食長齋又無兒媳獨守貞操期以闔棺鄉曲高之終見標異

漁陽太守陽尼妻高氏渤海人學識有文翰孝文教入侍後宮幽後表啟悉其辭也

史映周妻耿氏同郡滎陽人年十七適映周太和二十三年映周卒耿氏恐父母奪其志因奠映周哀哭而殞見者莫不悲嘆詔標門閭

任城國太妃孟氏鉅鹿人尚書任城王澄母澄為揚州
日率衆出討賊帥姜慶真陰結逆黨襲陷羅城長史韋
纘倉卒失圖孟勒兵登陴激厲文武喻之逆順咸有奮
志

魏書曰親自巡守不避矢石

賊不能克卒全城敕有司樹碑旌美

苟金龍妻劉氏平原人宣武時金龍為梓潼太守郡帶
閭城戍主梁人攻圍之會金龍疾不堪部分劉因厲城

民修理戰具一夜悉成拒戰百餘日兵士死傷過半戍副高景隆圖叛劉斬景及黨與數十人自餘將士分衣減食勞逸必同莫不畏而懷之井在外城尋為敵陷城中絕水渴死者多劉乃集諸長幼喻以忠節遂相率訴天俱時號叫俄澍雨劉命出公私布絹及衣服懸之城內絞而取水所有雜器悉儲之人心益固會益州刺史傳豎眼將至梁人乃退豎眼嘆異具狀奏宣武嘉之正光中封其子慶珍平昌縣子又得二子出身

貞孝女宗趙郡栢人人趙郡太守李叔盾女適范陽盧
元禮性至孝父卒慟幾絕數四賴母崔氏慰勉得全三
年中形骸銷瘠非扶不起及返夫家念與母分隔便損
飲食涕泣不絕日就羸篤盧氏合家慰喻不解因遣歸
寧乃復故如此者八九及元禮卒李追亡撫遺事姑孝
謹母終于洛陽凶問初至舉聲慟絕一宿乃蘓水漿不
入口六日姑慮其不濟親送奔喪而氣力危殆自范陽
向都八旬方達攀櫬號踊遂卒有司以狀聞詔追號貞

孝女宗

魏書載詔曰孔子稱毀不滅性為其廢養絕類也李
既非嫡子而孝不勝哀志厲義遠不加旌異曷挽澆
浮

易其里為孝德里樹李盧二門以惇風俗

河東姚氏女字女勝少喪父無兄弟母憐而守養年六
七歲便有至性人言其父輒垂泣隣伍異之正光中母
卒勝年十五哭泣不絕聲水漿不入口數日不勝哀亦

卒太守崔遊申請營墓立碑自為制文表其門閭比之
曹娥改其里曰上虞里墓在都城東六里大道北至今
名孝女塚

刁思遵妻魯氏滎陽人嫁未踰月思遵亡父母矜其少
寡許嫁已定魯聞之以死自誓父母不違其志遂經郡
訴稱刁氏恠護寡女不使歸寧魯乃與老姑徒步詣司
徒府自陳情狀有司聞奏節閔詔依式標榜

武功縣孫道溫妻趙氏安平人万俟醜奴反圍岐州久

之無援趙謂城中婦女曰今州城方陷義在同憂遂相率負土晝夜培城城竟完大統六年贈其夫岐州刺史贈趙安平縣君

孫神妻陳氏河北郡人神當遠戍主吏配在夏州意難其遠有孤兄子欲以自代陳曰為國征戍道路遼遠何容身不肯行以孤侄自代天下物議誰其相許神感妻言乃自行在戍未幾便喪樁柩至陳望而哀慟一哭卒文帝詔表其閭

稗史曰顏氏北齊時揚州獄吏妻有絕色太守聞而奪之遂自刎今傳顏氏小娘子塚是

宋婦李氏見父諡傳

譙國夫人冼氏高涼人也為南越首領部落十餘萬家夫人幼賢明在父母家已撫循部眾能行軍用師歷服諸越每勸宗族為善由是信義結于本鄉越俗好相攻擊夫人兄南梁州刺史挺恃其富强侵掠傍郡嶺表苦之夫人多所規諫由是怨隙止息海南僭耳歸附者千

餘洞梁大同初羅州刺史馮融聞夫人有志行為其子
高涼大守寶聘之融本北燕苗裔初燕主馮弘投高麗
遣融大父業以三百人浮海歸宋因留新會自業及融
三世為守牧他鄉羈旅號令不行至夫人誠約本宗使
從民禮每與夫寶參決辭訟首領有犯法者雖親族無
所縱捨政令有序人莫敢違後遇侯景反廣州都督蕭
勃徵兵援臺高州刺史李遷仕據大旱口遣召寶寶欲
往夫人疑其反之

隋書載夫人曰刺史據召援臺乃稱有疾鑄兵聚衆
而後呼君今若往必留君質追君兵衆願且無行以
觀其勢

數日遣使果反遣主帥杜平鹵率兵入潞石寶以告夫
人曰平鹵入潞與官兵相拒勢未得還逸仕在州無能
為也宜遣使詐之云身未敢出欲遣婦往參彼必無防
慮我將千餘人步擔雜物唱言輸賤得至柵下賊亦可
圖從之遣使果大果覘夫人衆皆擔物不設備夫人擊

之大捷因總兵與長城侯陳霸先會于潁石遂謂竇曰
陳都督極得衆心必能平賊君厚資給之及竇卒嶺表
大亂夫人懷集百越數州晏然子僕年九歲以陳永定
二年遭帥諸首領朝于丹陽拜陽春郡守後廣州刺史
歐陽紇謀反召僕至南海誘與為亂僕遣使歸告夫人
夫人曰我為忠貞經今兩代不能惜汝貞國遂發兵拒
境紇徒憤散僕以夫人功封信都侯轉入龍太守詔使
持節冊夫人为高涼郡太夫人齎繡纒油絡駟馬安車

一乘給鼓吹一部并麾幢旌節一如刺史儀至德中僕
卒陳亡嶺南未有所附數郡因共奉夫人號為聖母隋
文帝遣總管韋洸安撫嶺外陳將徐瑨以南康拒守洸
不敢進初夫人以杖南犀杖獻陳主至此晉王廣遣陳
主遣夫人書諭以國亡命其歸化并以犀杖及兵符為
信夫人見杖驗知陳亡集首領數千人盡日慟哭乃遣
其孫瑰帥衆迎洸洸至廣州嶺南悉定表瑰為儀同三
司冊夫人為宋康郡夫人未幾番禺人王仲宣反圍洸

進兵屯衡嶺夫人遣其孫暄帥師援光時暄與逆黨陳佛智素相友故遲留不進夫人大怒遣使執暄與州獄又遣孫盎討佛智斬之進兵至南海與鹿愿軍會共敗仲宣夫人親披甲乘介馬張錦傘領毅騎衛詔使裴矩巡撫諸州其倉梧首領陳坦岡州馮岑翁梁化鄧馬頭藤州李光略羅州龐靖等皆來參謁還令統其部落嶺南悉定帝拜盎為高州刺史仍以夫人誠效特赦暄拜羅州刺史追贈寶為寶州總管封謙國公冊夫人為燕

國夫人開幕府置長史以下官屬給印章聽發部落六
州兵馬若有機急便宜行事降敕書褒美賜物五千段
皇后又以首飾及宴服一襲賜之夫人並盛于金篋并
梁陳賜物各藏一庫每歲時大會皆陳于庭以示子孫
曰汝等宜盡赤心向天子我事三代主惟用一好心今
賜物具存此忠孝之報時番州總管趙訥貪虐諸俚獠
多亡叛夫人遣長史張融上封事論安撫之宜并言訥
罪狀帝遣使推訥得贓竟致於法敕委夫人招慰亡叛

夫人親載詔書自稱使者歷十餘州宣述上意諭諸俚獠所至皆降帝賜夫人臨振縣湯沐邑一千五百戶贈僕崖州總管平原郡公仁壽初卒諡誠敬夫人

別史曰夫人身長七尺兩乳長二尺餘或冒暑遠行必搭乳肩上

鄭善果母崔氏清河人年十三適滎陽鄭誠生羊果周末誠攻尉遲迴力戰死于軍母年二十寡父彥睦欲奪其志崔抱善果曰婦人無再醮義且鄭君雖死幸有此

兒棄兒不慈背亡夫無禮違禮滅慈非敢聞命後善果以父死王事年數歲拜使持節大將軍開皇初封武德郡公年十四兩授刺史尋為魯郡太守崔賢明博涉書史通曉政事每善果出聽事輒坐胡床于軒後察之聞其剖斷合理歸則大悅賜坐相對談笑若行事不允或妄嗔怒母乃還堂蒙袂而泣終日不食善果伏于牀前不敢起崔方起謂曰吾非怒汝乃愧汝家耳吾為汝家婦知汝先君忠勤清恪未嘗問私以身殉國

愚按誠亦周臣也當以尉遲迴忠于周室為殉國耳
不得以此語目誠

吾亦望汝副父此心汝既少孤吾孀婦耳有慈無威使
汝不知禮訓汝自童子襲茅土今位至方岳豈汝身所
致邪不曉夜思此而妄加嗔怒以驕樂墮公政內則墜
爾家風或失亡官爵外則虧天下法以取罪戾吾死之
日何面目見先人于地下乎崔恒自紡績夜分分而寢
善果曰兒封侯開國秩俸幸足毋何自勤如此答曰吁

汝年已長吾謂知理今聞此言猶未也汝之秩俸乃天子酬汝先人當散贍六姻為先人惠妻子奈何獨擅其利又絲象紡績婦人之務上自王后下及大夫士妻皆然若墮業者是為驕逸吾可自敗名乎初崔自初寡使不御脂粉常服大練性又節儉非祭祀賓客酒肉不妄陳于前靜室端居未嘗輒出門閭內外姻戚有吉凶事但厚加贈遺皆不詣其門非自手作及莊園祿賜所得雖親族禮遺不許入門及善果厯任州郡內自出饌于

署中食之公廨所供皆不許受悉用修治公宇及分俸
佐善果亦由此克已號為清吏煬帝遣御史大夫張衡
勞之攷為天下最徵授光祿卿母卒後善果為大理卿
漸驕恣公清平允不及疇昔矣

孝女王舜趙郡人父子春與從兄長忻不協齊亡之際
長忻與其妻同謀殺子春舜時七歲次妹粲五歲又次
妹璠三歲並孤苦寄食親戚舜撫育二妹恩義甚篤而
陰欲復讎長忻殊不為備及二妹俱長親戚欲嫁之輒

拒不從乃密謂二妹曰我無兄弟致父讐不雪吾輩雖
女子何用生為我欲共汝報復汝意何如二妹皆垂泣
曰惟姊命夜中姊妹各持刀踰牆入手殺長忻夫婦以
告父墓因詣縣請罪姊妹爭為謀首州縣不能決大帝
聞而嘉歎特原之

韓覲妻于氏河南人字茂德父實周大左輔于氏年十
四適覲雖生長青腴動遵禮度躬自儉約宗黨敬之年
十八覲從軍没于氏哀毀骨立慟感行路每朝夕奠祭

皆手自捧持及免喪父憐其幼少無子欲嫁之誓不許
遂以夫孳于世隆為嗣身自撫育愛同己生訓導有方
卒能成立自孀居後惟歲時或歸寧至親族家絕不來
往有尊卑就視者送迎皆不出戶蔬食布衣不聽聲樂
以此終身隋文帝聞而嘉歎下詔褒美表其門閭長安
號節婦門終于家

愚按于氏父子兄弟或黨宇文泰或附楊堅隨時佞
仰幾不識君父何人名節何事當以此一女愧之

陸讓母馮氏上黨人性仁愛有母儀讓即其孳子也間
皇末為播州刺史贓貨狼藉為司馬所奏案覆得實將
就刑馮氏蓬首垢面詣朝堂數讓罪

隋書載馮氏數讓曰汝無汗馬勞致位刺史不能盡
誠奉國而贓貨狼藉若言司馬誣汝百姓百官不應
皆誣汝若云至尊不憐汝何故治書覆爾忠臣孝子
固如是乎不忠不孝何以為人

於是流涕嗚咽親持盃粥勸讓食既而上表求哀詞情

甚切帝愍然改容獻后甚竒其意請于帝治書侍御史
柳彧進曰馮氏母德之至有感行路戮讓何以為勸于
是集京城士庶于朱雀門遣舍人宣詔曰馮氏以嫡母
慈愛義感人神特宜矜免用獎風俗讓可減死除名復
下詔褒之賜物五百段集命婦與馮相識以旌寵異

劉昶女河南人長孫氏婦也昶在周尚公主為上柱國
彭國公位望甚顯與隋文帝有舊及受禪甚見親禮歷
左武衛大將軍慶州總管其子居士為干牛備身不逆

法度帝以昶故屢原之居士轉恣恒大言曰男兒要當
辨頭反縛蓬蔭上作擦舞耳每取公卿子弟雄健者輒
將歸家以車輪括其頸而捧之若頻死不屈便稱爲壯
士釋與交黨與凡三百人趨捷者號餓鶻隊武力者號
蓬轉隊構鷹絙大連騎道中毆擊路人多所侵奪長安
市里無貴賤皆辟易公卿妃主亦莫敢與校昶女每乘
泣誨之居士不改至破家產昶年高奉養甚薄女時寡
居哀昶如此每歸寧于家躬勤紡績以致肥鮮後有人

告居士與其徒遊長安城登故未央殿基向南坐前後
列隊意不遜每相約曰當作一死耳又時有人言居士
遣使引突厥令南寇當于京師應之帝謂昶曰今日事
當何如昶猶恃舊恩不自引咎直前曰黑白在至尊帝
大怒下昶獄捕居士黨與憲司又奏昶事母不孝女知
昶必不免不食數日每親調飲食手自捧持詣大理餉
父見獄卒跪以進之獻赦鳴咽居士竟坐斬昶賜死于
家詔百寮臨視時女絕而復蘇者數矣公卿慰喻之女

言父無罪坐子及禍詞情哀切人皆不忍聞見遂布衣蔬食終身帝聞嘆曰吾聞衰門之女興門之男固不虛也

鍾士雄母蔣士臨賀人士雄仕陳為伏波將軍陳主以士雄嶺南酋帥慮其反覆留蔣氏都下及晉主廣平江南以士雄在嶺表欲以恩義致之遣蔣氏歸臨賀既而同郡虞子茂鍾文華等作亂攻城遣召士雄仕雄將應之蔣氏謂曰汝若背德忘義我當自殺于汝前雄遂止

蔣氏復為書與子茂等諭以禍福子茂不從尋為官軍所敗帝聞蔣氏言甚異之封安樂君縣時伊州寡婦胡氏不知何許人甚有志節為邦族所重江南之亂亦諷諭宗黨守節無從叛逆封密陵郡君

孝婦覃氏上郡鍾氏婦也與夫相見未幾夫亡時年十八事後姑以孝聞數年間姑及伯叔皆相繼死覃氏家貧無以葬躬自節儉晝夜紡績十年葬八喪為州里所敬文帝賜米百石表其門閭

元務光母盧氏范陽人少好讀書造次必以禮盛年寡
居諸子幼弱家貧不能就學盧氏每親自教授最以義
方漢王諒起兵遣將綦良往山東略地良以務光為記
室及良敗慈州刺史上官政簿籍務光家見盧氏逼之
盧氏以死自誓政為人凶悍怒甚以燭燒其面盧氏執
志彌固竟不屈節

裴倫妻柳氏河東人少有風訓大業末倫為渭源令為
賊薛舉所陷倫遇害柳氏時年四十有二女及兒婦三

人皆有色柳氏謂之曰汝父已死我自誓不生矣然家
風有素義不受辱我將與汝等同死如何女等垂泣曰
惟命柳氏遂自投于井其女及婦相繼下皆死井中

趙元楷妻崔氏清河崔儵女家有禮度

隋書曰元楷父為僕射重崔氏門望遂聘為元楷妻
雖在宴私不妄言笑進止容服動合禮義

守文化及之反元楷隨至河北將歸長安至滄口遇盜
僅以身免崔氏為賊所拘請以為妻崔氏曰我士大夫

女為僕射于妻今日自可即死終不為爾賊婦羣賊毀裂其衣縛於床箒上將陵之崔氏懼為所辱詐之曰今力已屈當惟命賊遂釋之崔因著衣突取賊刀倚樹而立曰欲殺我任加刀鋸若覓死可來相逼賊大怒亂射殺之元楷後得殺妻者夫解以祭

論曰婦人職主中饋以柔順為先斯乃舉其中庸而未臻其極至于明識遠圖貞心峻節惟義所高攷之圖史亦何代無之哉魏隋所叙列女凡三十四人自王公妃

主下至庶人女妻盖有質邁寒松心踰匪石或忠壯誠
懇或文采可稱雖于政集之於前元凱綿之于後比其
美節何以尚茲故知蘭玉芳貞乃稟其性矣

南北史合注卷一百六十九